



Jumat, 01 Juli 2022

Ogen: Kuan kuanen 1:2



Nampati Gelañ Pentar



Wari enda si peringeti wari Perpustakaan Nasional. Ningetken kerna fungsi perpustakaan e man banta, e me erbahan penelitian ilmiah, ingan erlajar, ras ingan ndarami informasi. Perpustakaan e nampati kita erlajar nambahi pemete*h* i bas proses belajar mengajar. I je erbage-bage buku si isikapken guna encukupi keperluan hususna i bas nambahi pemete*h*. Tu*h*u erlajar e seh kel perluna, bagi rusur si begi selogan, *long life education*, ertina erlajar segedang geluh. Erlajar e salah sada metodena e me ngoge. Genduari enggo lit perpustakaan on line, si nikapken segudang ilmu man banta. Lanai perlu kita bengket ku bas sada perpustakaan umum entah perpustakaan sekolah. Cukup arah aplikasi enggo banci si dat kai si iperluken kita. Sada pengajuk man banta e me nggit ngoge guna ndarami ras nambahi pemete*h*. Kuan-kuanen 1:2 e pe pengajuk raja Salomo man bangsa Israel gelah ngaloken pengajaren si mehuli, ras ngantusi ranan si mbages ertina. Siniajarken Raja Salomo e e me, guru hikmat, orang tua ras anak-anak. Jadi, kerina lapisan masyarakat iajuk ngaloken pengajaren e. La lit masyarakat si ertamat-tamat i bas erlajar, termasuk guru hikmat. Reh buena erlajar reh lalana si lenga eteh, usur-usur erlajar kita reh pentarna i bas ngalaken kecibal geluh. Si nggit erlajar e me kalak si ermeteruk ukur, si tetap akapna lit kurang i bas ia. Lenga akapna ia beluh amin enggo melala pemete*h* i bas ia. Salomo pe nuduhkan gudang pemete*h* e e me Pustaka si badia. I je melala disiplin ilmu si banci si idatken umpamana nandai diri ras karakterta: nggeluh bujur, kerja keras, megenggeng, saber ngalaken persoalen, pang nuriken si payo, ras mehuli. I bas bidang sosial: uga kita ngergaken teman, la erelem-elem, nampati ras engkelengi, mediate man sekelewet, uga cara erdahin alu payo, cara ngerana alu payo, makeken waktu alu payo, beluh muat keputusen si mehuli. Iujungi Salomo pengajarenna alu mabai perpulungen kempak Dibata. IA me ulu kepentaren si tu*h*u-tu*h*u. Amin melala si dat pemete*h* arah perpustakaan, kawitkenlah tetap ku kata Dibata.